

Sortir dal nuclear

«Verds» franzos scrivan a president Hollande

■ (gsc) A 50 km a nord da Basilea, amez il pentagon Minca-Milaun-Paris-Londra-Hamburg ha la Frantscha mess ad ir 1978 sia emprima centrala nucleara : Fessenheim. Dapi onns pretend'ins en Frantscha, Germania e Svizra da metter fin a l'exploitaziun da Fessenheim, pervi da sia vegliadetgna e da sia situaziun en ina regiun periclitada da terratrembels (Basilea 1356). Ils 22 da fanadur 2013 han president Hollande ed il minister de l'ecologia confermà lur empermischun da serrar la centrala enturn la fin da 2016. Ils 26 da november 2013 ha la gassetta online «France 3 Alsace» derasà ina novitad che scheva : «Oz enturn las 16.45 han ins dudi l'alarm incendi en la centrala nucleara da Fessenheim. Igl era vegni fim en la sala da maschinas ordaifer l'intschess nuclear (...). Cun metter ad ir ina pumpa, avev'ins fatg cular ieli sin in conduct chaud. Ils pumpiers èn festinads immediat, ma i para ch'i na saja prorut nagin feu. A las 17.30 han ins mess fin a l'alarm incendi.» Fessenheim è mo la pli veglia da las 19 centralas nuclearas franzosas. «Electricité de France» (EDF) publitgescha lur glista sin sia pagina-web. Ina, quella dal Bugey, è situada a Saint-Vulbas, sper il flum Rodan, tranter Genevra e Lyon. Il 9 d'avust 2011 han negligentschas cumbinadas manà a stargiar per sbagli in cupitgader da rument da demoliziun radioactiv. Perquai è creschida la radioactivitad da l'ambient ; qua e là è la perfin triplada. La rait «Sortir du nucléaire» (www.sortirdunucleaire.org) ha lur inoltrà plant encunter EDF ed il schef da la centrale. Ils 11 da settember 2013 èni vegnids sentenziads a pajar multas ed a indemnisar «Sortir du nucléaire».

«Per amur da noss biadis»

Ins vul pia serrar Fessenheim, ma co statti cun tshellas centralas nuclearas ? Ils 12 da november ha Arnaud Montebourg, «ministre du redressement productif» (sic !), declerà ch'ins na duaja serrar nagina centrala nucleara, danor Fessenheim. La regenza franzosa tardiva dapi mais per annunziar eventualas serradas. Ella è uschè flailva ch'ella na vul betg sa liar en chausa avant las elecziuns europeicas (25 da matg 2014). Per quai ha «Sortir du nucléaire» recumandà a commembras e commembers en la Frantscha continentala da scriver a president François Hollande, appellond a sia conscienza da schef d'in stadi che fa diever da lezza energia. In d'els, che viva en la patria occitana dals catars medievals, ha mess sia brev dals 28 da november 2013 a disposiziun da La Quotidiana.

Lez document, translà en rumantsch, tuna sco suonda: «Lais Vos, signur president, esser il president d'in nov Fucuschima ? La regenza [da primminister Jean-Marc Ayrault] propona da far viver las centralas nuclearas anc tschinquanta onns. Quai na munta tutina betg ina transiziun energetica, mabain in pass enavos, in pass privlus ed irresponsabel. L'unica transiziun vardavla fiss da metter fin al nuclear, oravant tut a las centralas las pli veglias, ed a promover fermamain las energias regenerablas. Jau sper che Vos prendias la decisiun curaschusa da far frunt a la lobi nucleara, per amur da la qualitad da vita da noss biadis (...). J.-F. P., burgais conscient.»